

Buna litteratura per la giuventetgna

Dapi 75 onns datti carnets dad OSL

■ **(anr/gc) Dapreschent datti en la Biblioteca centrala a Turitg in'exposiziun davart «75 onns OSL – 50 onns Fundaziun OSL». En il decurs da 75 onns ha l'Ovra svizra da lectura per la giuventetgna (OSL) edì na main che 2300 titels e vendì radund 50 milliuns carnets. L'intenziun da procurar per buna lectura e stimular il plaschair da leger tar la giuventetgna – la finamira oriunda – è pia vegnida cuntanschida.** Era per rumantsch èn plirs cudeschets dad OSL cumparids. La Lia Rumantscha è dal reminent partenaria da la OSL e procura la redacziun dals cudeschets en noss linguatg. Tar ses gronds auturs quinta la purtadra da la Fundaziun OSL era Toni Halter (sper Max Bolliger, Jeremias Gotthelf, Meinrad Inglin, Olga Meyer, Johanna Spyri e.a.) che ha edì 1948 en quella retscha il «Misteri da Caumastgira», vegnì illustrà dad Alois Carigiet. 1960 è Toni Halter vegnì distinguì cun il Premi svizzer per il cudesch da la giuventetgna da l'Uniun svizra da scolasts.

Buna lectura per pretschs favuraivels

La OSL è vegnida fundada 1931 da scolasts, la Pro Juventute, las autoritads d'educaziun chantunals e da la Societad d'util public cun l'intenziun da procurar buna litteratura ed uschia cumbatter tala da pauc. Sustegn ha i era dà da l'Uniun svizra da scripturs e da l'Associazion svizra da scolasts. 1932 – avant 75 onns – èn ils emprims carnets

vegnids edids. Els custavan be 25 raps il toc per facilitar la cumpra a tuts circuls socials. 1957 – pia avant 50 onns – è la OSL daventada ina fundaziun. Enconuschents auturs svizzers han scrit per questa retscha. Ins ha mess paisa ch'i sa tractia da texts per preleger, raquintar e leger sez, drizzads segund ils basegns da la scola: Cudeschets per l'emprima lectura sco era per il stgalim mesaun e superiur.

Vitiers vegn ch'ils carnets dad OSL han adina era gì ina funcziun da far punts tranter las quatter linguas nazionalas. Dapi 1934 datti cudeschets en franzos, davent da 1939 en talian e dapi 1941 er en rumantsch (vallader, puter, surmiran, sutsilvan, sursilvan ed uss era rumantsch grischun). I ha sa tractà lez onn dad ina brochura «650 onns confederaziun» ch'era in tschert Rütli spiertal amez la Segunda guerra mundiala.

La OSL è ina instituziun d'util public che na vul betg far gudogn. Ils pretschs per ils carnets da buna lectura èn bas era pervi da sustegniments finanzials dal maun public e sponsurs. Il concept da distribuziun sa basa sin voluntaris, spezialmain èn quai scolastas e scolasts. En ils onns 1960 devi fin 5000 voluntaris. Ins po dentant era comprar ils cudeschets en librerias. Ils davos onns è l'esit dals carnets OSL s'auzà ed ha dà novs impuls – era sco consequenza d'ina studia da Pisa che aveva constatà mancanzas tar la abilitad da leger.